

# «Adina ina aventura culinara»

Magazin per mangiabains «Graubünden geht aus»

DA GION NUTEGN STGIER / ANR

■ **Tenor ils experts dal nov guid per gourmets è l'Engiadin'Ota la regiun cun la meglra gastronomia. Restaurants cun ina buna cuschina chattan ins dentant er en Surselva. Pli manglusa sa preschenta la situaziun en Surmeir e cunzunt en Surses.** Cun blera tragischur e gloria è vegnì preschenta a Flem l'ediziun 2012 dal magazin «Graubünden geht aus». In cudesch da 200 paginas nua che radund 20 experts recumondan 120 restaurants grischuns cun ina buna cuschina. La schelta saja betg stada uschè simpla, ha ditg *Wolfram Meister*, il schefredactur, cun esser la gastronomia en il Grischun en general sin in aut nivel. Radund 150 restaurants han ils gourmets visità ed a la fin decidì per 120 da quels che duaian cumparair en l'ediziun 2012 dal magazin per persunas che van gugent ordaifer a mangiar. *Wolfram Meister* di ch'el viadi culinaric tras il Grischun saja adina in'aventura, per el sco er per ses collegas che prendan ils cuschiniers sut la marella.

## Be a San Murezzan 18 buns restaurants

Dals 120 restaurants che han tenor ils experts ademplì il pli fitg ils criteris per vegnir numnads e preschentads en la pli actuala ediziun da «Graubünden geht aus» cumparan gist 49 per l'emprima giada en il magazin. Sfegliond il cudesch per mangiabains croda subit en egl che cunzunt l'Engiadin'Ota è ferm represchenta en quel. Gist 40 restaurants da quella regiun tutgan tar ils 120 megliers locals dal Grischun. Sulettmain da San Murezzan figureschan 18 en il nov magazin «Graubünden geht aus». Quai fa dentant strusch surstar cun ils blers giasts nobels che fan adina vacanzas en ils hotels da luxus a San Murezzan e pretendan er ina gastronomia d'emprima classa. Surstar fa però tuttina che da quels 18 restaurants dal lieu turistic mundial è nagin da quels sin l'emprim post en tut las 11 catego-



Ina nova e cunzunt buna adressa è il «Ecco on Snow», il restaurant da l'hotel Giardino Mountain, Champfèr.

FOTOS MAD

rias ch'i dat en il magazin. Cun il restaurant «Mezdi» è almain ina buna adressa da San Murezzan sin il segund post en la categoria cuschina creativa. Dentant betg be a San Murezzan è la puschida gastronomica bunamain perfetga, mabain er en ulteriurs lieus da l'Engiadin'Ota. Gist 22 bunas adressas han ils experts scuvert da Segl fin Zuoz. Locals cun ina cuschina exquisita èn tranter auter il «Bellavista», Surlej, la «Chesa Pirani», La Punt, il «Kuhstall» ed il «Muriutsch», Segl e la «Chesa Salis», Bever.

## Trais restaurants sursilvans

Er l'Engiadina Bassa ha cun la «Crusch Alba» Guarda betg mo in bun restaurant, mabain anc ovgul ulteriurs. Total vegnan preschentads da quella regiun gist nov restaurants cun ina cuschina eccellente.

In paradìs per gourmets è dentant er la Surselva, pertge en l'ediziun 2012 dal magazin «Graubünden geht aus» figureschan gist 16 bunas adressas. Insatge è cler che en Surselva ins chatta las meglras ustrias en ils vitgs, vul dir giud via ubain a l'ur dals lieus turistics. Quai conferma bain er che en la categoria restaurants dals vitgs han ils experts mess gist trais restaurants sursilvans davant en la rangaziun. Quai èn: 1. «Casa Alva», Trin; 2. «Casa Fausta Capaul», Breil; 3. «Stiva Viglia», Schnaus. Da nov figureschan tranter las meglras adressas dal Grischun er il restaurant «Miracla», Breil. Ils restaurants dals restaurants èn Surselva è per ils experts anc adina il «Epoca», Flem, ina adressa per vairs gourmets.

## Be in restaurant da Surses

Da Tavau fin Landquart han ils mangia-

bains e schurnalists chattà 14 buns locals cun ina cuschina particulara. Il meglier è anc adina il «Walserhof», Clostra, dal reminent il restaurant preferì dal prenzì Charles da l'Engalterra. A Coira e cunturn è da nov tranter ils megliers restaurants il «Falknis», Maiavilla, ina chasa cun ina cuschina eccellente ed a Cuir tutgan «La Staila» ed il «Va Bene» anc adina tar las top adressas. En Surses han ils experts cun buccas finas chattà cun «La Veduta», Beiva, be in bun restaurant. Savognin saja davaira nagin paradìs per gourmets, ha ditg *Wolfram Meister*. Il nr. 1 a Lai è sco gia ils davos trais onns anc adina il «La Riva», ina adressa che er *Roger Federer* conuscha bain. Da Beiva fin Lai cumparan en il magazin «be» set buns restaurants uschia che quella regiun è segir nagin eldorado per persunas che mangian bain.



Il «Kurhaus» Bravuogn è per ils experts e schurnalists dal magazin er ina buna adressa per mangiabains.



Ralph Lindenmann, mainagestion da gourmedia cun Lucia Monn dal restaurant «Casa Alva» Trin, ina da las meglras adressas dal Grischun per persunas che giudan tratgas finas.